

INUIT ATAQATIGIIT

INATSISARTUNI



UPA 2014/172

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiupparput:

Inuiaqatigiit kissaataat tunngavigalugit nunap ilaani aatsitassarsiorfissanik inerisaaviusussanik pilersitsinissaq aammalu nunap ilaani allani avatangiisit, ilorrisimaarneq, inuussutissarsiutit pioreersut assigisaalluunniit tunngavigalugit aatsitassarsiorfigineqarusunngitsunik pilersitsinissaq pillugu oqallisissiamik saqqummiusseqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut. Oqallisissiaq innuttaasunik, soqutigisaqaqati-giinnik aalajangiisartunillu peqataatitsinikkut amerlasuunit akuuffigineqartumik oqallinnissamut toqqammaviusaaq. Oqallisissiaq 2015-imi upernaakkut ataatsi-miinnissaq nallertinnagu naammassineqareersimassaaq.

(Inuit Ataqatigiit Inatsisartuni gruppianni ilaasortat)

Tungavilersuut

Isumaqarpugut aatsitassarsiorneq pillugu oqallittarnerni sammisamut ataatsimut tunngasoq eqqartussallugu sumiginnartarsimagipput. Aatsitassarsiornermik timip piisigut qanoq pior-saarusunnersugut oqallisiginikuunngisaannarparput. Nunatsinni sumiluunniit killilersuiner-taqanngitsumik aatsitassarsiorortoqartassava imaluunniit arlaanni peqarusuppugut aatsitas-sarsiorfigineqaqqusassaannngitsunik?

Nunap ilaanik aatsitassarsiorfigineqaqqusassaannngitsunik pilersitserusunneq assigiinngit-sunik patsiseqarsinnaavoq. Inuussutissarsiutit pioreersut, pinngortitaq qajannarluinnaq-qissaartoq, qanittuani inoqarfiit il.il. patsisaasinnaapput.

Nunatsinni aatsitassarsiornerup amerlasuunit tapersersorneqarnissaa pingaaruteqarpoq. Taamaammatt pingaaruteqarpoq sammisamut tassunga tunngatillugu innuttaasut oqaase-qarnissaminnut periarfissinneqarnissaat. Inoqarsinnaavoq aatsitassarsiornermut akuersaar-luartunik, taamaattorli sumiiffimmi aalajangersimasumi aatsitassarsiorortoqarnissaanut qular-tunik. Nunarput aggornernut immikkoortitertuugutsigu nunatta isikkuanut ilaatillugu siu-nissami aatsitassarsiorortoqarnissaa amerlasuunit isumaqataaffigineqartoq qulakkeersin-naavarput.

Soorunami siunissami nunap ilaata aggornernut immikkoortiterneqarnera akuersissuteqar-luni maannakkut ingerlatanut sunniateqartussaannngilaq. Kisiannili siumut sammisumik ataatsimoortumillu akisussaassuseqarluni oqallittoqarnissaa suli angumerisinnaavarput.

Pisortani aningaasaqarnikkut allaffissornikkullu kingunerisassaat

Nalilerneqarpoq oqallisissiornerpiartaa ukioq kaajallallugu AC-itut sulinertut 500.000 kr.-inik akeqassasoq. Nutserinermut allanullu atugassat tamatuma iluanippit. Ilimanarportaaq oqallisissiornerup ingerlanerani oqallisissiap imarisaanut tunngatillugu suleqataasunik naleq-quttunik suliament tunngasunik oqaloqatigiittarnissamut allaffissornikkut isumalluusiisoqar-tariaqassasoq. Tamatuma saniatigut inuppalluttumik oqallinnissamut toqqammavissius-sanut atuagaaqqiorsinnaanernut, isiginnaarutikkut naatsunik aallakaatitassiorsinnaanernut atortussiorsinnaanernullu allanut ilassutinik aningaasartuuteqarnissaq naatsorsuutigineqar-tariaqassaaq. Suliniummut aningaasartuutissat pingaarnersuinermi killiliussamut pulatin-neqartariaqarput, tamannalu pisinnaavoq suliniutinik allanik tulleriissarinermi tunullin-ngortitsinikkut.

Namminersorlutik inuussutissarsiortunut aningaasaqarnikkut allaffissornikkullu kingunerisassa

Namminersorlutik inuussutissarsiortunut aningaasaqarnikkut allaffissornikkullu imaasiallaannaq kinguneqassanngilaq. Oqallisissiaq nunap aggornerinut immikkoortiterinermut toqqammavissiissappat tamanna soorunami namminersorlutik inuussutissarsiortunut kinguneqassaaq. Taamaammat oqallisissiap iluaneereerpoq oqallinnissami aggersumi suliasami peqataasut tamarmik tusarniaavigineqarnissaat.

Innuttaasunut aningaasaqarnikkut allaffissornikkullu kingunerisassa

Siunnersuut aatsitassarsiornermut inuit tatiginninnerannik qaffassaanermut ilapittuutaasinnaavoq aalajangiisarnernullu innuttaasut piginneqataasutut misiginerannik annertusaataasinnaalluni.